

Tarde bedde!

Tarde mije, Tarde bedde
si' lucènde cume stedde,
si' de core e face bene
pe' cingate ca no' tene.

Mare "MASCE", addò vè spicce?
Ma, ci' u sape?... e mare "PICCE":
'nu sciardine de frischezze
d'òskr'e cozze, cè biddezze!

Rittifile e lunghemare
'ngì stè angore dà fateiare,
già mo' pare 'nu trisore,
c'è alligrije pe' 'stu core!

Strate làrie e palazzune
e, ci' u crère mo', nesciune
ca 'stu TARDE bedd'e fine
l'ònna fare na riggine?

A li puete tarantine

Tinite sembe quedda vocc'a rise
püete affiziunate tarantine:
scrivite püisie bedd'e fine,
facite 'nnammurà tutt'u päise!

Vu' site fatiature, e tutte dritte
ci pure vu' tinite 'u core affritte
scrivite dòce e bedde li virsitte,
nesciune s'à vandate e state citte.

'A parme d'alligrije vu' purtate
pe' 'stu päise nuate affiziunate,
de TARDE site file acrianzate
ca date sembe anore a 'sta Citàte.

De 'sta Citàte ca vulime bene
scrivite sembe cose 'nziste è bedde,
mittle n'armunie ca 'ngì vo' quedde
e nazzecatle cu' canzune e suene!

Tarde vecchie ca sparisce...

– Uè Gisè, mo' l'onna fare
'stu päise cosa rare,
finarmende, doppe tande
Tarde vecchie mo' se sckande!

– Te stè spuèste, o t'è sunnate,
sembe sciùèche tu, Dunate?

– Nah, mannagghie!... Ma si 'tuèste?
Tune 'mmesce te stè spuèste...
'u giornale 'u porte scritte
ciò ca s'àdda fa' l'à ditte!

– Tann'u crère, quanne fanne
'stu päise bedd'e granne!

– No' 'nge è sciute p'a stanzione,
niend'è viste 'ngustruzione?
Và, v'arrive 'nzign'a 'mbonde,
stonn'a làrjene già 'u Ponde!

– Scè vidime, avien'acquane,
tastà vogghie cu' li mane...

– Cè stè vvire? Cè te pare?...
cu' li mane l'a tastare

Pasche e 'a sscarcedde

No' pòzze camenare pi' l'addòre
de li taradde, trecce e li sscarcedde:
furnare, sott'e ssuse, e a tutte l'òre
li 'nforne e sforne bone cusaredde
fatte da mane probbie de cuscenze
senza strimbigne, quann' è ggiust 'è ggiuste,
a ci le mange jacchie prijsce e gustè!
Cundende li peccinne e peccinnodde
piccè, le mamme fanne 'a picheredde
cu' l'ove jndre, battene manodde!
Li zite, de 'ste ggiurne fanne pace,
'u se' piccè? T'u diche: p'a sscarcedde
c'a zite pi' l'amore 'ngì la face.
Pe' mmè, scummett' a cape ca ij sule...
rumagne p'a sscarcedde c'u spiule,
ci po' 'ngì stè 'nquarcune ca m'a face,
l'azzett' abbuenesinne 'nsanda pace!

(dal numero unico "Pasca Tarantine")

M'agghie sunnate

M'agghie sunnate Tarde de 'stu core
cchiù megghie, è bedd' assè cume jè mòne,
sunnanne m'agghie ditte: cè sbrennòre!
zumbe faceve cum' a 'nu vuagnone,

videnne c'a stanzione, cu' 'nu vande
l'èrene fatte o' Bburghe, addò 'ngì vole,
li Tre Carrare, palazzune, tande,
e 'a Virimijnze, 'nderre, strate o' sole,

e p'a Marine jève 'na biddezze
cu' lu pruggette cu' a passiat' a mmare,
e praja praje 'nzign 'a Citrezze
palazze e cu retrove pi' mangiare.
E' finarmende, p' ògne chiazze à vviste
'nu munumende: Paisiljle, Coste,
Criscole, 'nu Cunsiglie, p'òtre 'nziste!

O Tarde, vi' ci v' uèze n'ògne 'a vòce,
fatte sindè, no' te tiner' a poste,
no' scè aspettanne quanne 'u vurpe còce.

Ci pèchere te face, t'u stè sseje ,
lupe te mange e, semb' arrète veje !

'U Natale o' desoccupate...

Pe' fatiature desoccupate
òsce pi' llore, quanda bundate!
Paste, farine, quist' è 'u riale
pe' fisteggiare Tatà Natale.

Piccè jndr' a l'anne no' donn' arenze
ci cu' a miseria vè lenze lenze
ca tanda vòte stennene 'a mane
purtà alli file n'ògne de pane?

Cè jè 'sta legge d'accussì stòrte?
Piccè à d'asistre 'sta mala sòrte
ci tutte quande do' paravise...
àmme scennute senza cammise?

'Ngì vo' 'a fatije o' desoccupate
no' anghierl'a panze...pe' 'na sciurnate.
No' jè prugresse, jè vvere 'nganne,
nònge se mange 'nu ggiurne l'anne!

'U pinziunate

"Bongiorne meste Cicce, cume sciame?"

"Arret' arrete, pèsce d' u zucare.

D' a facce no' me vide ca d' a fame
vòche pirenne? Quanda pen' amare!"

"Ma cè stè strulecate cu' 'stu chiande?"

"'A viritate figghie, pe' brivogne
no' stenn' a mane cume 'u mennicande
e prèje 'a mòrte cu m' accogghie nògne!

"N' arracapezze nijnde 'stu cirviidde:

ddò fateiate, 'a paje no' 'a pigghiate?
E mbè, piccè ve manghe 'u vuccungijdde?"

"Da dece mise, doppe quarand' anne
fateiate 'mbacce a' forgie 'na sciurnate,
pe' prèmie ca mo' tègne sessand' anne

m' ònne mannat' a ccase assutt' assutte,
cu' 'na pinzione, o' mese, pigghie chiste:
tremile e novecijnde lire rutte.

E àmma mangiare do' pirsune, pienze.
Mugghierme, puveredde, chiange triste,
tand' è 'u dilore, jèsse fòre sienze.

Do' peccinnudde

Do' peccinnudde
vune deci' anne e l'òtre cinghe,
s'ònn' abbrazzate fòrte fòrte
e ònne spittirrat' a chiangere
piccè, 'a Mamm' e 'u Tàte
ònne state accise!
Jèvene curpevule? 'Nnuciende?
Cè p'ònne capì 'st' aneme de Dije?
Penzene c'ònne rumaste sule, orfenel!
No' cchiù 'a sere d'a Mamm' e 'u Tàte
'u bagge d'a bona notte
e chiangene, chiangene
'ste do' criature, 'ste do' figghie
de "JULIUS e ETHEL ROSENBERG."

(dal giornale di fabbrica: "La Voce Del 24 Aprile")

Onne passate vindesett'anne

'Na sere, vindesett'anne fa
du' mill 'e noveciende trendaquate,
ne stè turnamm' a ccase
quase a llune de notte
ij, e Andonie Boccune 'u vareviere.
Prijsciate tutt'e doje
doppe 'a sirate pàssat' a l'Orfee
a vidè l'opirette "Scugnizze".
Stràte facenne, a ccore e sotta vòce
se candave: "Salomè".
'Sta prijscezze ne rumase 'nganne
piccè, probbie sott'u purtone de case
stavene quatt' angede custode
ca n'aspittavene, e n'accumbagnarene
dritte dritte a' caserme de li carabinieri.
Appene trasute jndre, ne sendemme de chiamare
da 'nu cendenare de vùce,
vuce amiche, fadiature cum'a nnuje.
Ccussi, 'mmienz'a l'òtre,
manettate doje pi' doje
ne carecarne su' a dece camionne
e, angore notte,
ne purtarne o' carcere de Bare.
Pigghiamme tanda da quidde frijdde p'a strate
ca quann' arevamme,
èrme cchiù muèrte ca vive!

Sarvame 'a PACE

Fadiature, prufessiuniste,
mamme e tanda ggiuvene
d'ògne paisè
pigghiene parte a li "Marce d'a PACE"
cu' a spiranze de fermà 'a mane
a ci tène 'ntenzione
de scatenà 'nu cunfritte mondiale!

'A 'uèrre,
n'adda fa' medità abbuenesinne.
'Na 'uèrre d'òsce,
jè 'a distruzione d'u munne
struggenne ciò c'u prugresse à crjate!

'Ngì stònne gende
ca facene li surde e li cicate
ma quanne po', accumenzene a cadè da 'ngijle
li cumbijtte rizzate,
allòre prejan'a Gisecriste
cu mett'a mana sove binedette!

Criste, s'adda prijare apprime,
e prijanne s'adda fa' pure 'nquarcose
pe' sarvare 'a PACE
ci no n'acchiame 'mmienz'a 'nu mare de 'uaje
cum'a 'uèrra passate
c'amme chiangiate pe' cing'anne!

Ggenuva-Tarde

“Alla mia cara Taranto e ai paesani tutti con affetto
dedico”

Pe' tott'a notte, no' agghi'achiusse l'uècchie
'u còre me sbatteve fòrte-fòrte,
agne menute appizzecav'a luce
'uardà 'u relogge, e me pareve ferme.

Appen' appene m'avè addurmesciute
'a sveglie sòne e mette 'nu ruete,
m'òze d'u lijtte mienze studechite,
chiam' a mugghierme cu me dè 'na mane

a preparà 'a balisce, e 'nu cafeje
pe' me putè pigghiare 'nu calmine
c'a cape me 'nzumbave p'u delore,
cè 'uaje quanne s'addevende vecchie!...

Attatr' attatre, arrive po' a' stanzione
ca manghe angore n' òre p'a partenze
e diche 'mbrà de mèie cu' a risa 'mmocche:
c'è fatte accume fanne li cafune?

D'a Frange arrive 'u trene, e pigghie poste
a 'nu scumpartimende addò 'ngi stònne